

## Sagardoaren kultura sustatzeko elkarlanean

4 urtetako prozesuaren ostean,  
sagardoaren kulturarekin  
harreman estua duten Hernani eta Usurbilgo  
herriek Sagardun Partzuergoarekin lanki-  
detza hitzarmena sinatu dute sagardoaren  
kultura sustatzeko helburuz.



Hiru herrietako alkateak

Hernani, Usurbil eta Astigarragaren arteko elkarlan  
hau 3 urtetan gauzatuko da eta honako puntutan oina-  
rrituko da:

- \* Hernani eta Usurbilgo sagardoaren kulturako eskaintza **Sagardoaren Lurraldea markapean** integratu, sustatu eta komertzializatzea.
- \* Hernani eta Usurbilgo **Sagardo Bideak** sortzea.
- \* Hernanik eta Usurbilek **Sagardoetxean** parte-hartzea.
- \* Hiru udalen artean **ekitaldi** berriak sortzea.
- \* Inguruko **herrien parte hartzea** sustatzea.

### “Sagardoaren Lurraldea ezagutuz” ibilaldia

Sagardoaren Lurraldea, Astigarraga, Hernani eta Usurbilgo Udalek antolatuta eta Mendiriz Mendi eta Andatza Mendi Taldea-ren laguntzarekin, “Sagardoaren Lurraldea ezagutuz” ibilaldia ospatu zen apirilaren 26an Astigarraga, Hernani eta Usurbilgo herrietan barrena.

Ibilaldi hau hiru udalen artean martxan jarritako elkarlanaren lehendabiziko ekimena izan da eta



Argazkien iturria: Sagardoaren Lurraldea

**ibilaldi hau urtero ospatuko da apirileko azken asteburuan.**

30 bat lagunez osatutako taldeak **Sagardoetxean** hasi zuen ibilaldia eta Lourdes Odriozola Sagardoetxeako historialariak, udaletxearen, Markesaren Jauregiaren eta Ergobiko zubiaren inguruko azalpenak eman zituen herrian egindako geldialdietan. Urumea bailara zeharkatuz, **Hernanira** iritsi eta Jexux Mari Gomez Hernaniko Udaleko Artxiboko arduradunak hirigune historikoko datu aipagarrienak azaldu zituen. Ondoren, Santa Barbaratik igo eta Lasarte eta Zubieta zeharkatuz, **Usurbilera** iritsi zen taldea.

Usurbilen “**Sagardogintza gure baserrietan**” erakusketa ikusgai izan zen goiz osoan zehar Potxoenea Kultur Etxean eta Lourdes Odriozola historialariak erakusketaren bisita gidatua egin zuen sagardogintzak historian zehar izan duen bilakaera eta sagardoaren munduak euskal baserriarekin izan duen erlazioa azaltzeko. Horretarako, iaz Sagardoetxean ikusgai egon zen aldi baterako erakusketari Hernani eta Usurbilgo baserrien azalpen panelak gehitu zitzaizkion. Ibilaldiari amaiera eman eta indarrak berritzeko, **bazkaria** egin zen Usurbilgo **Aialde Berri sagardotegian**, bertan giro apartaz gozatzeko aukera izan zelarik.

Hemendik aurrera hitzarmenean adosturiko elkarlanerako proiektuekin lanean jarraituko dugu gure sagardoaren kultura sustatzeko.

Sagardoaren Lurraldea  
[www.sagardoarenlurraldea.com](http://www.sagardoarenlurraldea.com)